

Surat khabar: Utusan Borneo (Horizon)

Hari/Tarikh: 10/5/2016

Muka surat: A1

Tajuk : Universiti perlu manfaat pembelajaran teknologi



KERJASAMA: (Empat dari kanan) Mienczakowski, Chan dan Idris bergambar bersama yang lain semasa lawatan ke Curtin Sarawak baru-baru ini.

Oleh Sudan Ajang

**MENTERI** Pendidikan Tinggi Datuk Seri Idris Jusoh meluangkan masa melawat Universiti Curtin Sarawak Malaysia (Curtin Sarawak) semasa berkunjung ke Miri baru-baru ini. Turut serta mengiringi beliau ialah Ketua Pegawai Eksekutif (CEO) Malaysian Qualifications Agency (MQA) Profesor Datuk Dr Rujhan Mustafa, Setiausaha Politik Menteri Pelajaran Tinggi Datuk Abdul Halim Jusoh, Naib Canselor

Universiti Malaysia Sarawak (UNIMAS) Datuk Dr Muhamad Kadim Suaidi dan Timbalan Naib Canselor Profesor Mohammad Fadzil Abdul Rahman. Rombongan telah disambut oleh Pro Canselor Curtin Sarawak, Datuk Patinggi Tan Sri Dr George Chan Hong Nam, Pro Naib Canselor, Presiden dan Ketua Eksekutif Profesor Jim Mienczakowski, lebih 30 kakitangan pengurusan, dekan fakulti dan ketua jabatan dan pengurus profesional.

Semasa lawatan, rombongan turut mengadakan sesi dialog dengan wakil Curtin Sarawak, antaranya membincang sektor pendidikan, pedagogi dan teknologi pembelajaran inovatif dan kerjasama penyelidikan antara universiti. Idris dalam pada itu melahirkan rasa berpuas hati dengan perkembangan di Curtin Sarawak termasuk pencapaian cemerlang melalui pengiktirafan kursus sama ada di peringkat nasional dan antarabangsa seperti

Institution of Chemical Engineers (IChemE); Engineers Australia (EAust) dan Board of Engineers Malaysia (BEM) dan terbaharu Association to Advance Collegiate Schools of Business (AACSB). "Saya turut memuji komitmen universiti dalam meluaskan kampus khususnya pembinaan bangunan baharu Fakulti Kejuruteraan dan Sains berharga RM20 juta termasuk Pusat Bio Teknologi bernilai RM50 dan pertama seumpamanya di utara Sarawak," katanya.

Beliau turut menggalakkan universiti memanfaatkan sepenuhnya penggunaan teknologi terbaru dalam penyampaian pembelajaran. Katanya, ini sejajar dengan inisiatif kementerian memastikan Malaysia terus kekal dalam pasaran pendidikan global. Beliau serta rombongan turut meluangkan masa melawat Pusat Pelajar Curtin Sarawak, bilik pembelajaran dan bangunan baharu Fakulti Kejuruteraan dan Sains.